

JON

gv Siti Jichonam

Mintamchonam

Jon gv lvkchola lvkdam jenam siti si aba baanyi go doodu: Pwknvyarnv gvla okv ninyigv Kuunyilo Jisu Kristo gvlo lvkin gobv ribam la singmu dubv vla sum purinv vdwa mintvmiru la lvkto okv ribam nama miyakriyak dubv rinv oogv tamsar sarmurnv vdwa bunua gamrwto. Svbv tamsarnamv nyiamooku adwnamar so ridula alvmabv rinam lo mvngjwngla riku lokv minto, okv vkvlv-gabv Pwknvyarnv gv Kuunyilo Jisu Kristo adwnamar lo jvjvrv rila mabv rito. Oogv tamsarnv vdww vbv minto ringlinsunam lvgabv nyiamooku sokv alvmanv singnam am kayu lvjv tvlaka vto; okv bunu vdww vbvka tamsar dvto ringnambanam lvgabv alvbv gwngnamv rikirilak bv rinam lokv vbvmajvka pakmisinam lokv oguguka kvvbi lvgabv minsngo kaama dunv.

Svbv tamsar sarkurnam sum tvvkurtvrwk sidula lvknv ngv rvbwng alvbv Jisu Kristo jvjvrungnv nyi gobv rito kunyikv vla minto okv hv daadwvrv yabv minjito yvvdw Jisu Kristonyi mvngjwng dunv okv Pwknvyarnvnyi pakdunv hv ajin anying ngaka pakrungre.

Arwng lokv darlinnam

Mintamchonam (1:1-4)

Kanv okv loung (1:5-2:29)

Pwknvyarnv gv umvuu vdww okv Uyudvbv gv umvuu vdww (3:1-24)

Jvjv okv rigakpanam (4:1-6)

Paknam gv kudungkua (4:7-21)
Rigumnvnnv mvngjwng (5:1-21)

Singdung gv Gamchar

¹ Klugv gv doodung sunv singdung gv Gamchar lvkwnglo, ngonu nonua lvkdunv. Ngonu um tvvpaato, okv ngonu nyik lokvka kaato; um, ngonu kaapv kunv, okv ngonugv laak lokvka mvsit laka rito. ² Vdwlo turnam si kaapa dubv rikubvdw, um ngonu kaatoku; vkvlgabv Abu gv lvkobv doonv oogv turbwngjinv singdung okv ngonua chimu kunam lvkwng lo oogv mintv dunv um, ngonu nonua minji dunv. ³ Ngonu ogugo tvvbvdw okv kaabvdw ngonu nonua minji dunv, vkvlgavbolo nonu ngonugv lvkobv akingobv ridu kula Abu gvla okv ninyigv Kuunyilo Jisu Kristo gv lvkobv ribam reku. ⁴ Ngonugv* mvngpuv paapwngpanya dukubv vla sum ngonu lvkdunv.

Pwknvyarnv Loung ngv

⁵ Ninyigv Kuunyilo gvlo tvvnam ngonugv vjvgv nonu gvlo minggo karjinam doin minam si: Pwknvyarnv ngv loung ngv, okv ninyi gvlo ogu kanv nam goka kaama dunv. ⁶ Vbvrikunamv, ngonu mindu ngonu ninyigv lvkobv ribam donv vtola ngonu kanv lo ridubolo, ngonugv gaam mingkulo okv gwngkuriku lo ngonu mvvji rijidu. ⁷ Vbvritola ngonu loung lo ridubolo—nw gv loung lo rinam aingbv—vbvrikubolo ngonu ajin a lvkin gobv ribam duku, okv ninyigv Kuunyilo, Jisu gv oyi lokv ngonua rimur mvnwng lokv kakkung dukunv.

1:1 Jn 1:1
Nonugv.

1:2 Jn 1:14

* **1:4** Ngonugv Kvggonv kitap lo

⁸ Ngonu gvlo rimur kaama vla ngonu mindu bolo, ngonuv atubonga kupsu dunv, okv ngonugv arwng lo jvjv ngv kaamado. ⁹ Vbvrítola ngonugv rimur am ngonu Pwknvyarnvnyi mingkukla minji yabolo, Hv ninyigv milvpvvi nama vvpvjire okv tarwkbak nvngv ogudw um ribvjire: Hv ngonugv rimur vdwa mvngnga jire okv ngonugv rimur kunam mvnwng lokv harkak jireku. ¹⁰ Ngonu rimur mapvnnv vla ngonu mindu bolo, ngonu Pwknvyarnvnyi mvvjidu, okv ninyigv gamchar vv ngonugv aralo doomadu.

2

Kristo ngonugv Ridurnv

¹ Ngoogv umvuu vdww, ngoogv sum lvkdung dunv si, ngo nonua rimur moku mare vla; vbvrijvka yvvdw rimur ridubolo, ngonu lvgabv Abua minji jinv akin go ngonu gvlo doodu—vv Jisu Kristo, darwkchongjornv angv. ² Okv Kristo atubogv vbvrinam vv ninyi ngonugv rimur am mvngnga jinam lvgabv, okv ngonugv rimur mvngchik um twkma, vbvrítola mvnwng gv rimur mvnwng aka mvngnga jiduku.

³ Ngonu Pwknvyarnv gv gamki nama tvvdu bolo, vbvribolo vv ngonu ninyia jvjvklvbv chin-rungdu ⁴ Ngonu ninyia chirungdunv vla mindula vbvrítola ninyigv gamki kolo tvvmabv ribolo, ngonu mvnvrnunv gobv ridukunv okv oogv jvjv ngv ngonugv arwng lo dooma dunv. ⁵ Vbvrítola ninyigv gamchar am tvvdu bolo, vv Pwknvyarnvnyi paknamv jvjvklvbv rvbwngchingnv akobv rirungdunv. Ngonu Pwknvyarnvnyi akingobv

ridunv vnam sum vbv ngonu alvbv ngonu chinsu lareku: ⁶ Ngonu Pwknvyarnv gvlo akingobv ribvdoobv doonv vla mindunv, ngonu Jisu Kristo gv rinam aingchingv rirungdubv ridu.

Anwnv Gamkinam

⁷ Ngoogv aya minsunam ajin vdww, soogv nonua lvkdungnam gamki si anwnv gaam ma; si kvvlogv nonugv akunv gamki go, akunv gamki si klu lokv nonugvlo dooto. Nonugv tvvrokunam doin angv hv akunv gamki ngv. ⁸ Vbvrijvka, ngoogv vjakgv gamkinam lvknam si anwnv, ogulvgavbolo soogv jvjvnam sum Kristo gvlo kaapado okv nonugv ara loka sum kaapado. Vkvlgavbolo kanv ngv nyeto kula okv jvjvrungnv loung ngv ungtoku.

⁹ Ngonu mindu ngonu loung lo ridunv vdula, vjvlodvbv kvvbia kaanwng madubolo vv vjakka kanvparam lo ngonu doobv dvdv dunv. ¹⁰ Ngonu kvvbia pakdu bolo, ngonu loung lo ridunv, okv vbrinamv ngonu yvvnyika* oguguka rimur dubv mvlwk lamare. ¹¹ Vbvritola ngonu kvvbia kaanwng mabv ribolo, vv ngonu kanv lo doodunv; ngonu hogv aralo vngdula okv ngonu ogolo vngdung dunvdw um ngonu chimadu, ogulvgavbolo kanv ngv ngonua nyikching mola ridu.

¹² Ngoogv umvuu vdww, Kristo gv amin bv nonugv rimur am mvngnga jitoku vkvlgabv ngo so nonua lvkdunv. ¹³ Abu vdwa, ngo nonua lvkdunv, ogulvgavbolo kvvlo lokv doodungnv yvvdw, um nonu chindu. Ngo nonua lvkdunv,

2:7 Jn 13:34 * **2:10** Yvvnyika oguguka; Vmalo Ngonua.

nyipayapa vdwa, ogulvgavbolo nonu Alvmanv Anga rigum yatoku.

¹⁴ Ngoogv umvuu vdwa, ngo nonua lvkdunv ogulagavbolo, nonu Abunyi chindu. Abu vdwa, ngo nonua lvkdunv, ogulvgavbolo ninyia kvvlo lokv doodung nvngv vla nonu chindu. Nyipayapa vdwa, ngo nonua lvkdunv, ogulvgavbolo nonu gwlvknvbv riduku; Pwknvyarnv gv gamcharv nonu gvlo doolwkdu okv nonu Alvmanv Anga rigum yatoku.

¹⁵ Nonuno nyiamooku sum, vmajeka nyiamooku soogv ogumvwnwg nga pakyoka. Nonu nyiamooku sum pakdu bolo, Abunyi paknamv nonu gvlo kaama. ¹⁶ Ogumvngmwng ngv nyiamooku gvbv ridunv—ogugo atubogv lvgabv mvngmurla mvngdudw, ogugo nyiv kaadudw okv mvngbiu dudw okv nyi vdwgv kai mvngsunam ogumvwnwg si nyiamooku sokv gvbv ridunv—si Abu lokv aama dunv; Soogv ogumvwnwg si nyiamooku so lokv aadunv. ¹⁷ Nyiamooku vla okv soogv ogumvwnwg ngv nyi vdwgv mvngbiu namv nyedukunv; vbvritola yvvdw Pwknvyarnv gv mvnglwkw lo ridunv vv doobwngre.

Kristo gv Nyimak

¹⁸ Ngoogv umvuu vdww, ataranya aluv nvchi duku! Nonu vbv mindu Kristo gv nyimak vv aarikh vbvto; okv vjak Kristo gv nyimak vv achialvbv aalwk pvku, okv vbvrinamv ataranya aluv nvchi dukunyi vla ngonu chinduku. ¹⁹ Soogv nyi vdwsj jvjklvbv ngonugv ribam akin mago, okv vkvlvgavbolo bunu vdww ngonua kayutoku;

bunu ngonu gvbv rila ribam nvgobv ribolo, bunu ngonugv lvkobv doobamla ripv nvpv. Vbvrijvka bunugv kayu pikula kilin kunamv bunua jvjvk-lvbv ngonu gvbv rima dukunv vla mimbwkvrwk nvdu kubv riduku.

²⁰ Vbvritola nonu vdwgvlō Darwknv Dow am Jisu Kristo gv lokv pwlwkto, okv vkvlgabv nonu mvnwng ngv jvjv nama chindu kunv.

²¹ Vbvrikunamv, ngoogv nonua lvknam si nonu jvjvnga chima vla lvkma; Vbvmabvya, nonugv sum chinam lvgabv, okv nonuka sum chinsudu, mvvnam si vdwloka jvjv lokv lima dunv.

²² Vbvkubolo, mvvnv ngv yvkvudw? So si Jisunyi Messiah makv vnv vdvw. Vkvnv vbv mindunv nyiv Kristo gv nyimak bv ridunv—bunu Abu okv Kuunyilo am anyi baabwng nga tulatua du. ²³ Holvgabv yvvdw Kuunyilo am tulatua dudw vv Abu nyika tulatua dunv; yvvdw Kuunyilo am turwksidunv vv Abu nyika turwksidu.

²⁴ Vbvrikunamv, rirap lokv nonugv doin tvvnam am nonu haapok lo rvbwng alvbv kaaching pvvtoka. Nonu hogv doin am kaaching pvbolo, vbvribolo Kuunyilo gvlola okv Abu gvlo akin gobv doobvre. ²⁵ Okv si Kristo ninyigv ngonua turbwng nama jinvpv vla milvpvnamv.

²⁶ Ngoogv nonua lvknam si yvvbunudw nonua kupdubv gwngdudw ho lvkwngbv si lvkdunv.

²⁷ Vbvrijvka nonugv lvgabv, Kristo ninyigv Darwknv dow am nonugv aolo pwlwk jito. Vdwlo gobv ninyigv darwknv dowv nonu gvlo dubv ridw, yvka nonua tamsar dubv rinam kaamare. Ogulvgavbolo ninyigv darwknv dowv nonua ogumvwnng nga tamsarla rire, okv ogugo

hv tamsar pvdw vv jvjvngv, vv mvvnam kaama. Dow gv tamsarnam um tvvlaka, okv Kristo gvlo vngdwnng la akingobv ribv tvlaka.

²⁸ Okv ngoogv ayanam umvuu vdww, ninyi gvlo akingobv doobv tvlaka, vkvlgabv vdwwlo hv atubonga kaatam la riyikudw ngonu achialvbv pwktvpwkru riku okv hvkvgv aadw lo ngonu ninyia hinyinghirula toosila rikurgo kaaku mare.

²⁹ Nonu chinsudu Kristo Darwk nvgo vla; Vb-vrikunamv, yvvdw tarwkbak namv ogudw um ridunv vv Pwknvyarnv gv umvuu bv ridunv vla nonu chirung tvlaka.

3

Pwknvyarnv gv umvuu vdww

¹ Kaatoka Abu ngonua vdwwgo pakdu! ninyigv paknamv achialvbv kainamv ngonu Pwknvyarnv gv umvuu gobv minla sudukunv—okv vbvrinamv, jvjvklvbv, ngonuv vbvrije duku. Vkvlgabv sichingmooku si ngonua kaachin madunv: soogv vdww Pwknvyarnvnyi chimadu. ² Ngoogv ajin vdww vjak ngonu Pwknvyarnv gv umvuu vkula, vbvrijvka ngonu ogubv riyidw vjaklodvbv rvbwng bv chinbwk madu. Vbvritola ngonu um chindu kristo vdwwlo atubonga kaatam redw, ngonu ninyigv aingbv rire, ogulvgavbolo hv oguaingbv jvjvklv dudw ninyia ngonu vbvching kaapa sire. ³ Kristo gvlo yvvdw vbv mvngtin sidudw, Kristo gv darwknam aingbv bunuka awv darwk nvbv risudunv.

⁴ Yvvdw rimur ridunv vv Pwknvyarnv gv Pvbv nga mvvkmvrvk jidunv, ogulvgavbolo Pvbv nga

mvyaknam si rimurv. ⁵ Nonu chindu Kristo rimur* am lala laa tvvbv aato, okv ninyi gvlo oguguka rimur go kaama. ⁶ Vkvlgabv yvvdw Kristo gvlo akingobv ribam ridw vv rimur ribv kumare; vbvritola yvvdw rimur lo ribv dudw vv ninyia vdwloka kaakw madu vbvmajeka ninyia chimpa madu.

⁷ Ngoogv umvuu vdw, nonu yvynyika kupku yoka! yvvdw darwknv kudungkua nga ridunv vv Kristo gv darwknv rinam aingbv ridunv. ⁸ Yvvdw rimur ribv dunv vv Uyudvbv gvbv ridunv, ogulvgavbolo Uyudvbv ngv klu lokv rimur gvnv ngv. Soogv lvgabv Pwknvyarnv gv umvuu am kaatamto, okv Uyudvbv gv kudungkua nga mvvk-mvrvk dukubv vla aatoku.

⁹ Yvvdw Pwknvyarnv gv umvuu bv ridu kudw vv rimur riching am ribv kuma dunv, ogulvgavbolo Pwknvyarnv gv ridungrima ngv bunu gvlo doodu kunv; okv ogulvgavbolo Pwknvyarnv bunugv Abu bv rikunam lvgabv, bunu rimur ribv-la rila kuma dunv. ¹⁰ Svbv riku lokv Pwknvyarnv gv umvuu vdw okv Uyudvbv gv umvuu vdw ho angu sinam am pwbwngvrwng dukunv: yvvdw alvnnv ogudw vkvnnv mvnwng nga rimanv vmalo kvvbi aka pakma dunv vv Pwknvyarnv gv umvuu bv rima dunv.

Ajin anying am Pakmisinam

¹¹ Ngonu ajin anyingnga pakmi sirung tvka: vnam si nonugv kvvlo gv tvvchonam doinv. ¹² Ngonu Kein gv aingbv rimabvka; Hv Alvmanv

3:5 Jn 1:29 * **3:5** Rimur; Kvgonv kitap lo Ngonugv rimur vdwa. **3:11** Jn 13:34 **3:12** Atk 4:8

Angv gvbv rito okv ninyigv atubogv boru Abel-nyi mvki sutoku. Ogulvgabv Kein ninyia mvki toku? Vkvlgavbolo ninyigv kudungkua rinamv rimurto, vbvritola ninyigv boru gv kudungkua rinamv rijwk yatoku.

¹³ Ngoogv ajin vdww, sichingmooku soogv nyi vdwgv nonua kaanek nama nonu ogubvda bvri mvngyoka. ¹⁴ Ngonu sinam lokv turnam lo aadu kunv vla ngonu chinu kunv; vkvlgabv ngonu kvbi aka pakmi sidunv vla ngonu chin-sudu. Yvvdw pakmi sima dunv vv vjvlodvbv sinam gv jwkrw arwng lo dubv dunv. ¹⁵ Yvvdw kvvbi mvnwng nga kaanek yadunv vv minvlenv gobv ridunv, okv minvlenv ngv bunu vdwgvlo turbwng nama paama dunv vla um nonu chin-sudu. ¹⁶ Pakmi sinam si ogudw vv ngonugv chinamv: Kristo ngonu lvgabv ninyigv turnam am jitoku. Vbvrikunamv, ngonuka kvvbi vdwgv lvgabv turnam am jitiv ngurv tvka! ¹⁷ Ngonu nyitv bolo okv kvvbi gv chichichilin manv am kaadu, vbvrijvka ngonugv haapok mvtum sutola bunua rinyingriru bolo, ngonu Pwknvyarnvnyi paktunv vla oguaingbv minla dubv? ¹⁸ Ngoogv umvuu vdww, ngonugv gaam raanam okv minam mvngchik lokv pakmwng yoka; Sum jvjvnnv paknam lokv, gwngtumritum la kaatam tvlaka.

Pwknvyarnv gv kaagelo Mvnggrwnam

¹⁹ Vbvrikunamv, Ngonu jvjv lokv gvngv vla oguaingbv um ngonu chinla redw; sibv ngonu oguaingbv Pwknvyarnv gv nvchilo vngdwngebv doolaredw. ²⁰ Ngonugv mvngdung

ngv ngonua miyakaya sidubolo, ngonu chinto laka Pwknvyarnv ngv ngonugv mvngdung nga kaiyanv ngv okv hv ogumvwnwg nga chindunv ²¹ Okv holvgabv ngoogv ajin vdw, ngonugv mvngdung ngv ngonua miyakaya suma dubolo, vv ngonu Pwknvyarnv gv nvchilo mvngrw dunv. ²² Ngonu ogugo koodudw ngonu ninyi gvlo paadu, ogulvgavbolo ngonu ninyigv mingkulo vngdu okv ninyia mvngpu dubv ridu. ²³ Kristo gv ngonua gamkinam aingbv, Hv oguv vla gamkito vv ninyigv kuunyilo Jisu Kristonyi mvngjwng laka okv ajin anyingnga pakmi silaka vto. ²⁴ Yvvdw Pwknvyarnv gv gamkinam am tvvla Pwknvyarnv gvlo lvkin gobv ridudw okv Pwknvyarnv bunua ka lvkin gobv ridu. Okv Pwknvyarnv gv dowa ngonu gvlo jilwk kunam lokv Pwknvyarnv ngonua lvkobv rimingvdu kunv vla ngonu chindu.

4

Jvjvnnv Dow okv Mvvnnv dow

¹ Ngoogv ajin vdw, yvvdw ngonu dow lo doodunv vnv nga mvngjwng yoka, vbvritola Pwknvyarnv lokv aanv Dow ogudw um bunua hingkwkaakw la malin chotoka. Ogulvgavbolo mvnnv nyijwk kv achialvgo ogolo ogolo linduku. ² Soogv si Pwknvyarnv gv Dowv vla um nonu oguaingbv kaachin nyola redw: yvvnyiv Jisu Kristonyi nyia adwnamar gobv aapvnnv vla chinla mindunv vv Pwknvyarnv lokv aanv dowa gvvdunv. ³ Vbvritola yvvnyiv Jisunyi

adwnamar bv aapvnnv vla mvngjwng madunv vv Pwknvyarnv gv lokv Dow gvvma dunv. Ninyi gvlo dow doodunv vv Kristonyi Nyimak bv rin v lokv ngv; nonu vkv nvngv aare vla minam um nonu tvvchoto, okv vjak vkv nvngv nyiamooku si aala riduku.

⁴ Vbvritola ngoogv umvuu vdw, nonu Pwknvyarnv gvbv ridunv, okv nonu mvvnnv nyijwk vdwa rigumriya nvngv, ogulvgavbolo nonu gvlo doonvdaknv Dow vv nyiamooku so gvbv rin v oogv dow am kaiyabv jwkrw doxadunv ⁵ Mvnnv nyijwk vdwv nyiamooku soogv ridung lvkwn-glo japdu, okv nyiamooku soogv vdwv bunua tvvji nyadu ogulvgavbolo bunu sichingmooku so gvbv ridunv. ⁶ Vbvritola ngonu Pwknvyarnv gvbv ridunv. Yvvdw Pwknvyarnvnyi chindudw vv ngonuam tvvjidu; Yvvdw Pwknvyarnv gvbv rimadudw vv ngonua tvvmadu. Vbvrikunamv, ngonu jvjvnnv Dow vla okv alvmanv dow vla ngonu angu sinam am kaachin sila dukunv.

Pwknvyarnv paknamv

⁷ Ngoogv ajin vdwv, Kaju ngonu pakmi sidukalam laju, ogulvgavbolo paknam si Pwknvyarnv lokv aadunv. Yvvdw pakmi sidudw vv Pwknvyarnv gv umvuu ngv okv Pwknvyarnvnyi chindunv. ⁸ Yvvdw pakmi simadudw vv Pwknvyarnvnyi chimadunv, ogulvgavbolo Pwknvyarnv ngv paknv. ⁹ Okv Pwknvyarnv ninyigv paknam am kaatam nvdubv ngonu lvgabv nyiamooku so ninyigv Kuunyilo akina jilwkto, vkvlgavbolo ninyigv lokv ngonuam turnam am paamu dukubv vla

ritoku. ¹⁰ Paknamv sibvching ridu: Si ngonugv Pwknvyarnvnyi paknam lokvma, vbvritola si ninyigv paknam lokv okv ngonugv rimur am mvngnga kunam lvgabv ninyigv kuunyilo akina jilwk kunamv.

¹¹ Ngoogv ajin vdw, Pwknvyarnv ngonua ogubv vbv pakdu bolo ngonuka ajin anyingnga pakmi sila ridukubv rirung tokuka. ¹² Yvka Pwknvyarnvnyi vdwloka kaakanv kaama, vbvrijvka ngonu ajin anyingnga pakmi sibolo, Pwknvyarnv ngonua lvkin gobv riming gvvdunv, okv ninyigv paknamv ngonugv arwnglo rvbwngmola riduku.

¹³ Ngonu chirung sudu ngonu Pwknvyarnv gvlo lvkin gobv riming gvdu okv ninyika ngonu gvlo lvkin gobv reming gvdu, ogulvgavbolo hv ngonua ninyigv Dow am jitoku. ¹⁴ Okv Pwknvyarnv Abu ninyigv kuunyilo nga nyiamooku am ringnvbaanv gobv jilwk nama ngonu kaatoku okv kvvbia minjitoku. ¹⁵ Yvvdw Jisu Kristo Pwknvyarnv gv Kuunyilo ngv vla minchar jikubolo, hv Pwknvyarnv gv lvkobv riming gvvdunv okv Pwknvyarnv ka ninyigv lvkobv riming gvdu. ¹⁶ Okv Pwknvyarnv gv ngonu lvgabv oogv pakmi sidubv jinam am ngonu atubongv chinsudu okv mvngjwngdu.

Pwknvyarnv ngv paknamv, okv yvvdw Pakmi sinamlo doodunv Pwknvyarnv gvlo lvkin gobv riming gvdu okv Pwknvyarnv ka bunua lvkobv riming gvdu. ¹⁷ Jwngkadaka dw alunyi ho ngonuv pvktvpwkru nyola nam lvgabv Pakmi sinamv ngonua pwbwngvrwng dubv mvduku; okv ngonu gvlo sum vbv paarungre ogulvgavbolo

nyiamooku soka ngonugv turla rinamv Kristo gv rinam aingbv ridu. ¹⁸ Ho pakmi sinam lv-gabv busukano namgo kaama; pwbwngvrwng bv pakmi sinamv busunam mvnwng nga charla chara dukunv. Vbvrikunamv, yvvgvlo busukano namgo doodudw vkvgvlo paknamv pwbwngvrwng namgo kaamadu, vkvlvgabv busunam si mvrit namlo dooming gvvdu.

¹⁹ Ngonu Pakdu ogulvgavbolo Pwknvyarnv ngonua pakcho gvvtoke. ²⁰ Ngonu mindu Pwknvyarnvnyi ngonu pakdu vbvritola kvvbi am kaanwng madubolo, vv ngonu mvvnnv bv ridu. Holvgabv ngonu kaapanam, kvbi ajin vdwsom pakma dunv bolo, ngonu kaapa nyoka manam, Pwknvyarnvnyi ngonu pakla nyomadu. ²¹ Kristo svkvnnv gaam sum gamki jila ngonua jilwk kunam si: yvvdw Pwknvyarnvnyi pakdunv vv kvvbi vdwaka paktoka.

5

Nyiamooku sum ngonugv rigum yakunam

¹ Yvvdw Jisunyi ringnvbaanv gobv mvngjwng dudw vv Pwknvyarnv gv kuu akobv ridu; okv yvvdw Abunyi pakdunv vv ninyigv kuu aka pakdu. ² Okv so si Pwknvyarnv gv umvuu am ngonu pakdunv vla ngonu oguaingbv chinsu dunv: vbvridunamv Pwknvyarnvnyi Paknam lokv okv ninyigv gamki nama tvvnam lokv. ³ Holvgabv ngonugv Pwknvyarnvnyi paknamv ninyigv gamki nga tvvnamv. Okv ninyigv gamkiv ngonu lvgabv achialvbv rika nyoma nvgobv

rima, ⁴ ogulvgavbolo Pwknvyarnv gv kuu ngv sichingmooku nga rigumyala dunv. Okv ngonugv mvngjwng sinam lokv sichingmooku sum ngonu rigum yadunv. ⁵ Yvvla sichingmooku sum rigum yajinv? Yvvniv mvngchikv Jisu Kristonyi Pwknvyarnv gv Kuunyilo ngv vla mvngjwng dunv.

Jisu Kristo gv lkwng lo mintamjijnv

⁶ Jisu Kristo ninyigv baptisma gv isi am okv ninyigv sinam gv oyi am aagv la aanv akin vvnv. Hv isi mvngchik ka aagv la aamato, vbvritola oyi okv isi am anyibabwng nga aagvto. Okv Dowv sum nw atubongv jvjvngv vla mintamjidu, ogulvgavbolo Dow si jvjv ngv. ⁷ Hoka mintam jijnv aomgo doodu: ⁸ Dow, Isi, okv oyiv; okv aom vv mvnwng ngv lvyin akinbv mintamjidu. ⁹ Ngonu nyia mindung bv minji nama mvngjwngdu; vbvritola Pwknvyarnv gv mintam jinamv achialvbv gwlwkyachok dunv, okv hv ninyigv kuunyilo gv lkwng lo mintamto. ¹⁰ Vkvlgabv yvvdw Pwknvyarnv gv Kuunyilo am mvngjwng sidudw bunugv haapok lo mintam namsi doolwkdu; vbvrijvka yvvdw Pwknvyarnvnyi mvngjwng madudw ninyia mvvnv gobv mvdukunv, ogulvgavbolo Pwknvyarnv gv oguaingbv ninyigv Kuunyilo lkwng lo mintam nama bunu jvjvngv vla mvngjwng madu. ¹¹ Soogv mintam namsi vbvridu: Pwknvyarnv ngonua turbwng nama jitoku, okv turnam si ninyigv kuunyilo gv lokv lindu. ¹² Yvvgvlo Kuunyilo vv doolwk dudw

soogv turnamv doodu; yvvgvlo Pwknvyarnv gv kuunyilo ngv dooma dudw vv turnama paama.

Turbwngnv Singnam

¹³ Ngoogv sum lvkdung dunv si nonuv turbwngnv singnam am paaduku vla chinmu dubv—Pwknvyarnv gv kuunyilo nga mvngjwng kunv ngv nonu. ¹⁴ Pwknvyarnv gv nvchilo doodubv ngonu gvlo pvktvpwkru namv doodunv ogulvgavbolo ninyigv mvnglwkw lo ngonu ogugo ninyia kooredw ngonua tvvrinvpv vla ngonu mvngpv rungdu. ¹⁵ Ngonu vdwgo ninyia koojvka hv ngonua tvvdu; okv si jvjvngv vla ngonu chindu, okv ngonu ogugo ninyi gvlo koodudw hv jidunv vla umka ngonu chindu.

¹⁶ Nonu mvngjwngnv ako rimur go ridubv kaadu bolo, vv sinam lo vnggv jeyomadu, Pwknvyarnv gvlo nonu kumrung tvlaka vkvglvgabv turnam jire. Svkvnv minam si rimurla siji kolo rilwk manv nga mindu. Vbvrkola rimur gonv vkvnv siji kolo vnggv jinvgv doodunv, okv ngo vkvnv vdw um Pwknvyarnvnyi kumrung tvka vla mima dunv. ¹⁷ Rigakpanam dvdv ngv rimure, vbvrkola rimur gonv sikungoku lo vnggv manv goka doodunv.

¹⁸ Pwknvyarnv gv umvuu ngv rimur ribv mare vla ngonu chindu, vkvlgavbolo Pwknvyarnv gv Kuunyilo ngv bunua ringchum la ridu, okv bunua Alvmanv Angv oguguka rinap lwknyu lama dunv.

¹⁹ Nyiamooku soogv dvdv ngv Alvmanv gv rigvdogv kongv bv rijvka ngonu Pwknvyarnv gvbv ridunv vla ngonu chindu. ²⁰ Pwknvyarnv gv kuunyilo ngv aala okv ngonua tvvchin nvnv nga

jipvnnv vla ngonu chindu, vkvlgabv ngonu jvjvnnv Pwknvyarnvnyi chindu. Ngonu jvjvnnv Pwknvyarnv gv lvkobv akingobv rinam lokv—ninyigv kuunyilo Jisu kristo gv aralo akin gobv doodu. Si jvjvnnv Pwknvyarnv ngv okv si turbwngnv singnam jiku ngv.

²¹ Ngoogv umvuu vdwy, nonuno atubongv mvvnnv pwknvyarnv vdwa hima sula ritoka!

ANWNV GAMLV
Tagin first Bible translation based on TEV (Good News)
copyright © 2018 The Word for the World International

Language: (Tagin)

Contributor: The Word for the World International

The New Testament in Tagin
Published as

ANWNV GAMLV

The Word for the World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-08-23

PDF generated using Haiola and XeLaTeX on 22 Feb 2024 from source files dated 15 Apr 2023

65e96bca-33d6-5dc6-a8ee-da485ecfb7ed